

國朝閨閣詩鈔

國朝閨閣詩鈔

第三冊

培遠堂詩集

長洲

張藻

于湘

悟雪堂詩鈔

南城

吳若水

瑩仙

綠淨軒詩鈔

錢塘

徐德音

淑則

柴車倦遊集

餘干

鍾令嘉

守箴

玉芳亭詩集

貴筑

陳淑秀

昭陽

靜香閣詩草

宿遷

倪瑞璿

玉英

清香閣詩鈔

桐城

姚德耀

景孟

一桂軒詩鈔

陽山

李毓清

秀英

鴻寶樓詩鈔

吳縣

楊鳳姝

蘋香

瑞圃詩鈔

漳浦

蘇世璋

文圭

第三冊

卷一

張夫人藻字于湘江蘇長洲縣人印江知縣之
項女雲南糧道鳳孫妹鎮洋畢禮室湖廣總督
沅之母著有培遠堂詩集四卷

培遠堂詩集

長洲張 藻于湘

送子沅巡撫陝西

讀書裕經綸學古法政治功業與文章斯道非
有二汝宦久秦中游膺封圻寄仰沐聖主慈寵
命九重賈日夕爲汝祈冰淵慎惕厲譬諸樽櫨
材斲小則恐敝又如任載車失誠則懼躓捫心
五夜慙報答奚所自我聞經緯才持重戒輕易

教敕無煩苛廉察無猥細勿膠柱糾纏勿模稜
附麗端已勵清操儉德風下位大法則小廉積
誠以去僞西土民氣淳質樸鮮糜費豐鎬有遺
音人文鬱炳蔚况逢郅治隆陶鈞綜萬類民力
久普存愛養在大吏潤澤因時宜搏節善調理
古人樹聲名根柢性情地一一踐履真實心見
實事千秋照汗青今古合符契不負平生學不
存溫飽志上酬高厚恩下爲家門庇我家祖德

詒箕裘罔或墜痛汝早失怙遺教幸勿棄嘆我
就衰年垂老筋力瘁曳杖看飛雲目斷秦山翠

靈巖山館夜坐

圓景下絕壁山館忽已暝石磴靜張琴雪泉清
淪茗不知夜已深月上青松頂

正月十二夜

銀缸暗畫堂坐數漏偏長雁影半牆月雞聲萬
瓦霜夜吟多遣興春夢不離鄉庭下微風起梅

花入幕香

落葉

微霜零木葉秋氣乍蕭森
亂逐西風下多隨涼
雨深紙窗延皎月苔磴失層陰
偶爾凭闌立平
林露遠岑

小園

小園半畝寄西城每到春深信有情
花裏簾櫳
晴放燕柳邊樓閣曉聞鶯漢書舊讀文猶熟晉

帖初臨手尚生自笑爭心仍未忘閒招隣女對
棋枰

雨夜

向晚花冥冥獨坐理琴譜一縷茶烟生疎簾散
春雨

抵署三首

驂駢乍解路三千風物琴川慰眼前到處聽來
人語好頻年豐樂使君賢

連朝話舊到更深不盡婁江望遠心莫怪老人
添白髮兒童幾輩換鄉音

周遭竹嶼與花潭檻外雲光映翠嵐儘有瑣窓
詩料在不須回首憶江南

探梅

光福寺前日欲曛上陽邨外望網緼千林萬壑
浩無際不辨湖光與白雲

松徑

曲徑彎環石級高滿亭山色綠周遭松風似厭
泉聲小自寫雲門百尺濤

春殘

斐几熏鑪百衲琴綠陰門巷晝沉沉春來小苑
無人掃花落窻前一寸深

第三冊

卷二

吳恭人若冰字瑩仙江西南城縣人貢生國枚
長女萬州知州晉勲姊分宜楊蘇材室襄陽知
府日鯤之母博通經史尤精歧黃著有悟雪堂
詩鈔

悟雪堂詩鈔

南城吳若水瑩仙

東山吟六首

泛宅東山下居然大雅堂
殷勤供井臼珍重侍
春漿熊膽文章窟雞聲
薜荔牆出門風景好喬
木兩三章

昔道山川勝今來信有緣
雙溪斜抱戶一笏直
撐天樂志心常遠安閒
性所偏種花兼種圃雅

不負林泉

初涉園林趣頽然百慮刪曙光瞻北斗淑景湛
東山遠樹春烟亂高峯積雪頑一行天際路蒼
翠有無間

岸岸開阡陌村村入畫圖小橋平架板矮屋細
編蘆野火看明滅山嵐倏有無日高慵未起啼
殺樹頭烏

晝長無一事也似在家時老病經營少空疎得

句遲筍憐牆外玉霜感鏡中絲兒婦知吾意茶
烟鎖日隨

暮色催朝色心安卽境安渾忘時序改祇覺水
雲寬迸筍看成竹寒流細作灘呼兒共永夜詩
卷足盤桓

大港口

行行疑路盡幽境豁然開一水分南北千秋此
去來斷橋猶枕石破寺只荒苔日暮深崖裏猿

吟幾度哀

月夜懷弟二首

萬里憐吾弟艱虞因此身青矜遲一第白首痛
雙親浪迹知何所交情有幾人今宵相憶處涼
月白如銀

自汝離鄉縣頻年音信無遙憐身落泊不復念
妻孥壯志凌飛鳥歸心警夜烏別來經十載昨
夢又模糊

仲夏雨窗卽事

涇雲殢雨暗簷牙薄絮還從葛外加繞徑漫分
幽圃菊沸鐙初試碧巖茶蠅貪墨瀝窺青管蜂
困窗櫺齧絳紗小院深扃人不到爐烟輕裊一
絲斜

寄鯤兒

金風颯颯夕陽天倚遍柴門望眼穿南極星辰
尊一老西園圖史集羣賢梧桐記閨垂陰密茵

舊迎秋出水鮮見說春臺山色美莫耽雲卧負
華年

拜月詞三首

今昔天邊月悲歡遽不同昔時曾拜爾今日故
愁儂

不種庭前樹惟貪月色多誰將山岳影顛倒作
枝柯

欲斫月中枝縛作齊天帚夜夜掃輝光不使微

雲垢

周家渡曉發

二月春光上柳腰一堤紅盡失雙橋板舟昨夜
橫塘泊小水新添尺五潮

一片石題詞三首

脈脈驚魂散未收隨風還上舊粧樓休言家破
身無主也占名城土一邱

紅瑜牙板按宮商幾曲清歌足斷腸詞客不須

嗟玉碎芳魂久住白雲鄉

百年殘塚賸無多四尺荒碑草一窩何日章門
維短櫂寒漿冷酒酌湘娥

題山水圖

遠山青與近山連野樹蕭蕭古路偏日暮小橋
無客過一灣秋水自寒煙

第三冊

卷三

徐宜人德音字淑則浙江錢塘縣人漕運總督
清獻公旭齡女中書江都許迎年室開封同知
佩璜之母著有綠淨軒詩鈔紀瑞詩集

綠爭軒詩鈔

錢塘徐德音淑則

王明君儻

才士執高節美人裕令姿富貴豈不欲窮達安
其時漢皇重顏色詔選良家兒王穰有好女秀
色可療飢麗容難自棄一旦進彤墀長門與金
屋權乃在畫師先容所不屑賄賂非無貲丹青
旣失意粉黛將安施曲逆久殞謝誰復出六奇

龍城老飛將長信索蛾眉孤憤幽永巷寧隨秋
草萎顧影徒自惜慷慨吐芳詞乃陳掖庭令誓
將靖邊睡從容別丹陛左右皆驚疑朱霞映白
雪眇眇生光輝朝庭恥失信抱恨出漢畿殷勤
托父弟猶幸少憐之驅馬向絕漠加號爲閼氏
黃雲迷白草毳幙驚沙飛胡笳鳴四野中夜肝
腸摧琵琶時獨語泠泠一何悲哀鴻唳青冢朔
雪冷瓊枝遂令千載下長懷漢明妃和我非得

已廟算良在茲借令老宮掖後世何由知
鉏蘭與泣玉古今傳者誰疇昔六王畢燕趙多彼姝
阿房作焦土艷骨成香泥折腰翹袖舞恩寵未
嘗移四皓兆人彘傾城乃禍機豈若慷慨節使
我興遐思

白紵歌

羲和六轡迴蒼龍長紅小白紛作叢織肢綽約
隨流風翩翩冶態如驚鴻一寸眉峯暈春碧酒

潮欲上蓮顛赤熱心擬化百枝鐙長倚君王照
瑤席

題大癡道人山水圖

昕夕畫水兼畫山淋漓元氣在筆端此圖神妙
洵傑作誰歟抗手惟荆關連雲欲接富春嶺鼓
櫂直溯桐君灘晚飯雕胡然楚竹路轉山腰見
茅屋日冠山衣雨何人想見土風尙淳樸自笑
頻年車轆轤子舍棲遲就微祿吾家舊在湖山

澳別來幾度春山綠曷不言歸種杞菊晴窗展
畫三摩挲移情如奏成連曲

投筆圖

豈薄雕蟲技翻思汗馬功生當封定遠夢含笑
文通聖代烽煙靜儒生意氣雄百年同一擲感
慨畫圖中

樓居火後示大兒佩璜

高樓一炬委荒蕪補屋何從更賣珠釀酒已無

田種秫打門猶有吏催租
晝操薪桂慵拈筆
夜對釭花學辟繡
盡付鬱攸無長物
舟居陸處總艱虞

答陳竹町

曾課嵇男住歲餘
簡編勤誦髮慵梳
偶緣紅藥爲佳壻
更戀蘋花卻聘書
老去稻粱謀野鶴
才高滄海掣鯨魚
華亭同愧滄塵土
願借春風一掃除

試劍石

石上痕如切純鈎性最剛陽山飢渴日何不試
夷光

出塞

六奇枉說漢謀臣後此和戎是婦人能使邊庭
無牧馬蛾眉也合畫麒麟

第三冊

卷四

鍾安人令嘉字守箴號甘茶老人江西餘干縣人處士志順女鉛山州同蔣堅室編修士銓之母中年而寡教子成名隨宦遊歷甚廣著有柴車倦遊集

卷四

柴車倦遊集

餘干鍾令嘉守箴

黃鶴樓

誰見鶴飛去神仙不再過
招魂才士盡遺韻酒人多
文字風猶霸江山氣不磨
南朝資鎖鑰天險究如何

金陵

難爲子孫守不是帝王居
一片風流地千秋醉

夢餘劫灰塵久積金粉氣難除只有秦淮上笙
歌六代如

登太行山

絕磴馬蕭蕭羣峯氣力驕蒼雲橫上黨寒色滿
中條返轍河如帶攔車跡未遙龍門劃諸水禹
力萬年昭

越州

保邦憑智術存國仗陰謀吳越同歸盡晉豕蝨定

孰優川巖名郡別淳樸古風留可惜田疇少都
人貴遠游

臘日寄銓兒八首

北地寒威重憐伊客裏身音書差慰我貧賤莫
驕人失路皆由命安時卽報親師言當服習莫
負誨諄諄

汝婦能承順無時離膝前居然兼子職久已得
姑憐生育宜佳氣平安似昔年傳聲語夫壻孤

館減憂煎

汝妹依邱嫂幽窗共食眠穿鍼纔學繡識字不
成篇閨訓寵知聽童心未盡蠲歸期寧解卜時
刻擲金錢

頻年思子淚前月抱孫纔憶汝孩提似原他祖
德該啼聲勞客試秀骨或天來歸日應過膝聞
當笑口開

心清憐下第約畧似前番官道應攀柳家庭已

樹萱恃才防暗忌交友戒多言結習還當掃新
詩莫訴冤

力學看駒隙從游汝得師遙分五秉粟足供十
人炊汝友皆相念肥甘數見貽呼吾如若母問
慰過時時

僕婢愛菘韭同鋤半畝園門關饒歲月居僻遠
塵喧夜火機伊軋家人樂笑言眼昏今益甚書
帙懶重翻

夢爾天涯路肩輿往復頻師方爲講學客豈是
依人駟馬題橋志雙親屬望身而翁墳上草今
已四回春

送銓兒赴禮闈

半生常在別離間又整行衣厚着絲雙眼漸昏
鍼線亂寸心無著夢魂牽關河此去風霜遠骨
肉何因聚散偏不用登高望親舍泥金須早慰
堂前

題自繡梅花詩圖三首

屈鐵孤梅葬古苔
巡檐寒夢凍難開
分明一幅
鴛溪絹繡出詩人小像來

淚珠成串上殘絨
十指寒香敵朔風
驀地停鍼
魂欲語梅花如雪照房櫳

身後君無封禪書
迴文老去底須摹
他時留與
兒孫看此是安人繡字圖

自題歸舟安穩圖七首

館閣看見十載陪虛他福薄易生災寒儒所得
要知足隨我扁舟歸去來

一艇平安幸已多胸中原未有風波團樂出又
團樂返兒頷鬚長母鬢皤

一生辛苦備三從六十新叨墨敕封得向青山
梳白髮此心閒處便從容

書聲纔歇笑聲連乞棗爭梨繞膝前自笑老人
多結習課孫不及課兒專

三十隨夫四海遊江山奇處每勾留誰知老去
清緣在還坐東南輓水舟

手植松楸翠幾尋故山歸去怯登臨白雪深處
焚黃日可慰梁鴻庶下心

四十歸田可閉門焚香省過答天恩二年後更
添歡喜新婦爲婆子抱孫

第三冊

卷五

陳女史淑秀字昭陽一字玉芳貴州貴筑縣人
直隸兵備道法第四女工科給事中慶升妹諸
生周承元室著有玉芳亭詩集

玉芳亭詩集

貴筑陳淑秀昭陽

暮春詞

殘紅滿徑花狼藉
淡淡春風正無力
芳樹流鶯
漸染黃漫天飛絮
初飄白美人愁坐
嘆蹉跎望
斷天涯芳草多有恨
欲言言不得
纖纖素手彈
雲和林塘烟暖
晴明候鳥語間關
似相關
誰道春光足
解憂春光翻使雙眉皺

看菊有感

幾日別知己看花又一年雖然隔幽谷長自念
岑川雲落天光靜山空鳥語圓何人如菊淡惆
悵晚風前

秋月

羣峰收夕照孤月破秋煙一片眼空濶幾回神
寂然光飛絕域外影落美人前終古離憂者相
看長自憐

絳桃花

桃天原足詠色絳蕊逾豐光耀離南位輝騰赤
帝宮名隨細核重號比紫文隆片片朱衣錦枝
枝鶴頂紅雲霞分冶豔瑪瑙遜瓊瓏迥與銀花
合還將火樹同敷榮宜暖日裁翦愛春風定是
瑤池種移來小院中

淮陰道中

昭陽遺子謫人閒會列龍樓第一班楊柳折來

風雨夜芙蓉分得水雲顏不知世上無金屋猶
說臺前賜玉環薄命今生遙集處傷心何地可
容閒

落花

狼藉殘紅過短牆風前還逐蝶飛忙點機欲助
迴文思入戶頻窺半面粧金谷苔錢埋豔魄馬
嵬繡襪拾餘香劇憐鶯語藏新綠小閣重簾鎖
夕陽

月季花

嫦娥裝滿月初圓
綠鬢紅顏次第鮮
含淚微嫌春雨打
懷嬌一任朔風牽
頻來舞蝶終朝醉
閱過羣芳幾度娟
自惜色空花是幻
爭奇鬪勝獨堪憐

燈籠

絲絲入扣盡文章
圖圀中涵太乙光
代日頻教星退舍
濟人頓使霧收藏
十分虛鑑通千里
一

點丹心照四方普渡慈航何處問好當靜夜細
思量

偶成

雲鬢鳳凰釵怕整此情此意無人省有誰常伴
我愁吟月照一簾花弄影

采菱歌

會向南湖泛畫舟花開花落幾經秋年年溪女
同相采可惜風光不自由

思鄉

閨苑蓬山道路長
海天愁思正茫茫
迴腸一似
柔乾水萬轉千盤繞故鄉

第三冊

卷六

倪瑞人瑞璿字玉英江蘇宿遷縣人宜興進士
徐起泰繼室博覽羣書尤精史學著有靜香閣
詩草

靜香閣詩草

宿遷倪瑞璿玉英

過凌城廟謁古戴二公忠義塚

秋風鳴高空亂峯下斜照老樹枝交天蒼黃覆
古廟入門門殘碑太息拜遺貌憶昔明運衰羣
盜起聚嘯勦撫兩矢策蠶蠹變虎豹所過無堅
城蒼生任凌暴二公真人豪忠貞出天造金鐵
冶成心冰霜厲寒操賊鋒一朝逼矢石躬親冒

官小誓捐軀力薄那自料慷慨互爭先從容共
談笑燃砲擊賊人天地爲震悼賊用魘魅法蟻
聚蜂屯到衆寡勢不當頭斷臂猶掉成仁并取
義日月爭光曜碧血灑平蕪賊馬不敢蹈至今
曠野中白日常見燒如何八十年薦紳少愚弔
姓氏已稀傳父老猶相告蘭臺事纂修幽微須
闡耀誰爲秉筆人搜求不遺奧

四弟懇予易其名字取文王世子語爲更

名曰克所字微子因勗以詩

人生重賢豪不在名字美難以易相方赤將白
自此豈遂足追配效顰空復爾四弟性明慧翩
翩致可喜世業下相城生來故家子先人早棄
世淪落來居此家毀不謀歸僑寓貧如洗畫荻
復和丸提攜賴母氏就傅勤誦讀弱冠終軍齒
挺然才氣雄籍甚聲華起爾字與爾名呼之有
年矣忽然厭舊稱十呼嬾一唯向我索更之我

特不敢譏文取世子篇義載大戴禮宋郊改宋
庠飲香從此始名氏新易初譬若居新徙努力
事葺修棟梁庶不圯莫若江南橋踰淮化爲枳

戲贈山人李老

李山人年已翁可憐白髮顏猶紅矮茅屋是爾
宮青藜杖是爾童煙霞滿懷邱壑臥夜呼骨痛
朝呼餓戚施舉步行逡巡天意厚汝汝莫瞋汝
不見孫臏成名無一足符堅快意得半人

樊大舅客金陵有詩弔方正學先生墓次

韻

金川門入北平軍叔父周公逐嗣君碧血一區
埋十族青山千古護孤墳祠依忠烈緣同志蘚
蝕碑銘認舊文樵牧那知青史事經過也復弔
斜曛

閱明史馬士英傳

王師問罪近江濱宰相中書醉未聞復社怨深

謀汲汲揚州表到血紛紛金墉舊險崇朝棄郿
鳴多藏一炬焚賣國仍將身自賣姦雄兩字惜
稱君

金陵懷古

石頭天險壯層城虎踞龍蟠舊有名峙鼎三分
吳大帝渡江五馬晉東京高臺鳳去荒煙滿廢
苑螢飛茂草生往事不堪頻想像夕陽西下看
潮平

憶母

河廣難杭莫我過未知安否近如何暗中時滴
思親淚只恐思兒淚更多

第三冊

卷七

姚安人德耀字景孟安徽桐城縣人山東通判
馬書香室郎中齋之姑母博學工詩著有清香
閣詩鈔

清香閣詩鈔

桐城姚德耀景孟

姬傳六姪館選集放翁五古以誌喜

在昔祖宗時詩書守素業名字振當代人才分
雜沓規模三百年努力光竹帛豈惟人所憐頗
覺耳目愜小子今何幸清問方側席取爾二三
策嗚呼豈人力

景運方盛開飛騰上樓閣筆落九天上萬丈掃

寥廓風雲正蒼茫相望要不作佳事喜稠疊吾
詩安不作

縱川射蛟臺懷古

拔山力猛驅洪水老蛟何來遽集此石破天驚
秋雨翻民其爲魚家室毀漢皇神武何雄哉錦
帆一片縱江來兆民遮道訴蛟患餘勇一鼓強
弓開旌旗雲擁江潯闊水分兩道勢先奪手落
飛魚金僕姑不假吳鈞試一割消除民患笑談

中安瀾永奠真奇功骨青瘦白浮水面浪花翻
血長江紅千秋盛事不可沒高臺人向江頭築
武帝雄風今尙存邱山零落悲華屋有客乘舸
渡秋水目擊古蹟猶如此蒿萊滿地罨荒煙長
歌蕭瑟江之汜

茅屋行

于茅結屋深山中佳人寂寞依花叢門祚繁華
易消歇妝樓猶記當年紅祇今甕牖愁風雨侍

兒纖手牽蘿補謝家輕絮颺簾櫳門外春光原
媚嫵西鄰女伴過疎籬豔稱金屋藏蛾眉菱花
不是駐顏藥可堪辜負芳菲時翠袖甘向空山
老不願人矜顏色好君不見苧蘿村裏一通名
錦繡吳宮成茂草

夫子與予同庚七秩詩以誌喜

十八歸君早同庚願不違七旬今已屆雙壽古
尤稀佐政隨冰署還家拜錦衣百年春正永鹿

馭樂相依

綸沛堂新居落成

卜宅新營屋幾層穿簾賀客燕先登
小園惟富質簷竹老壁還留薜荔藤
十載客歸金嶺驛一
家人似玉壺冰兒曹漸次看成立
自覺門庭喜
氣增

寄候董蘭芬夫人

雲散風流兩地思
頻傳尺素見心知
燕門不少

歸鴻去疎懶常嫌作答遲

雲泥迢遞仰聞儀幾度春風柳色垂千里懷人
勞夢想吟箋長誦謝家詩

寄遵貞太夫人 并序

嫂氏遵貞能詩善畫敬繪白描羅漢冊
頁姪蔡入

覲進呈仰蒙

聖主品題入於內府秘苑珠林俾得與古名媛

墨蹟並傳不朽誠異數也子聞之喜而
賦此

白描妙手重當時百拜焚香獻御墀試問鳳城
千命婦幾人翰墨九重知

以桂花一枝供瓶玩

一從金粟影中過謫向人間歷歲多把酒問花
花不語嫦娥消息近如何

第三冊

卷八

李女史毓清字秀英廣東陽山縣人貢生王騶
室拔貢安福之母工詩善書以賢孝稱著有一
桂軒詩鈔

卷八

一桂軒詩鈔

陽山李毓清秀英

詠古二首

葛覃詩三章章三句凡六寥寥數十言勝作萬
言讚貴焉罔或驕富矣非縱欲雖長敬不弛雖
嫁孝尤篤闕雎洽宮闈麟趾孚宗族宜爾歌螽
斯樂只頌樛木卷耳嗟懷人陟矧痛我僕幽閒
兼貞靜窈窕具聖淑雅化起周南不厭日三復

彼爲后妃尊勤儉卑自牧想其主陰教壺範日
勉勗何況士庶妻妾稊比嘉穀標梅守迨吉江
汜民怨讟化行闔閭中草偃何其速聖言興於
詩有若清風穆此爲女學宗河海探星宿

太姒興周邦褒姒覆周祀盛衰何懸殊家國同
一理雞化忌司晨獅吼貽笑訾胡爲衛風中碩
人獨見美所繫德有無不繫貌妍鄙柔顏事舅
姑式穀貽孫子一堂敦雍睦外侮亦可弭溺愛

多不明齊家先克己勿言人皆非勿謂己卽是
凡事必自反尤悔庶寡耳強者馴粗暴弱者振
委靡知過毋自欺聞義貴能徙賢妻導夫善相
得魚從水悍婦逢夫惡爲害弓激矢方寸爭危
微終身判臧否休嗟食藜藿休豔衣朱紫惠吉
從逆凶徵驗有經史

婦誠三首

出嫁事舅姑恩義同父母云何事人親因我爲

人婦天合使之然順逆視所受愛子多愛媳慈
愛什八九愛者情之常不愛事之偶不問慈愛
無問我能孝否竭吾事親心可以占无咎出入
敬扶持奉養勤左右祀先肅蘋蘩燕客潔漿酒
服勞本婦職勿厭執笄帚姆媼須和顏姑叔莫
多口持躬務勤儉接物尙寬厚三從徵婦德百
行孝爲首作善天降祥積慶裕爾後

夫爲妻之綱妻亦與夫齊敵體均伉儷恩愛兩

不疑紅絲一繫足終身不更移無違著聖訓至
順昭坤儀男以剛爲貴女以柔爲宜雞鳴切戒
且舉案思齊眉肯效不賢婦琴瑟乖唱隨悍戾
與嫉妬不顧衆口嗤常諧偕老歡匪徇床第私
變守柏舟操益堅冰雪姿古來多淑媛一一垂
芳規賢豪克樹立半出內助資翟芾荷光寵彤
管場休辭人生寄一世百年有盡期惟留不朽
名萬古恒在茲

爲孝苦不足爲慈苦有餘愛而不知勞禽犢之
謂與女則課紡績男則課詩書課女與課男父
母心非殊高樓峙平地植基恒于初孟母切教
子斷杼三移居良田不耕耨沃土成荒蕪勿謂
此父職有咎豈在子撫摩過姑息玩好隨嬉娛
飾非代隱疚揚善加虛譽庭內日蒙蔽鄉鄰空
嗟吁是謂賊其子厥罪當何如賢母篤義訓心
殫志自舒熊丸佐苦讀襦戒申芳模上可答宗

祖下可光門閭

訓婢示長媳耿氏暨姪女慧芳孫女文瑛
等

貴賤固有異賢愚亦有分若從一律觀詰責徒
紛紛此輩多拙戇任事常畏勤鞭扑直忍受誥
誠如不聞厥性本重濁燕雀非鸞羣譬之樗櫟
材匠石費斧斤矜愚加訓誨赦過策勞動自然
久與化瘠土堪耕耘寒冬擁薄絮暑月愁饑蟲

殘羹與冷炙竈下潛悲辛誰無父母恩愛之如
掌珍家貧兩不活棄置難相親念此愴我懷彼
亦人子身爾曹須體恤慎勿輕怒瞋

第三冊

卷九

楊恭人鳳姝字蘋香號茸城女史江蘇吳縣人
戶部郎中大琛長女衡州知府上海李心耕室
著有鴻寶樓詩鈔

鴻寶樓詩鈔

吳縣楊鳳妹蘋香

鳴鳥行

文德遠被威鳳來翔昔巢阿閣今憩高崗百鳥
咸寂一鳴歸昌遨遊天際誰與頡頏維樹有梧
植山之陽維竹有實生河之梁願爾周觀乎大
荒戢翼乎明堂德輝下覽昭嘉祥燦然華國以
文章休哉泰運邁虞軼唐和氣所感帝篤之慶

來傳帝命其聲鏘鏘祝我聖祚萬億年長

月夜

蛩吟攬殘夢虛室忽生白披衣展綺寮皓魄光
盈席銀潢淡無痕花影搖窗隙雲際落清音征
鴻度空碧

讀古四首

大風蕩浮雲中原紛逐鹿雄飛一墜翼不如終
雌伏卓哉張子房終身遠恥辱報韓秦皇驚從

漢項氏蹙功名炳日星襟期渺鴻鵠赤松四皓
閒來遊不待速信死何亦囚倉皇多反覆一爲
飲食謀神龍可以畜

太真臨江誓隕涕揮中流安石草堂弈談笑無
所憂從容與慷慨道不相爲謀冥然成大功經
濟同其優咄咄殷浩輩不能運一籌塵談竟何
補盛名徒貽羞

有宋一代禍介甫爲之首紛紛侈變更僨事由

自負專斷曰有才堅愷曰有守遂成洛蜀爭適
藉章蔡口洛陽鳴杜鵑其兆實希有遺蹟垂千
年周官受其咎

千古祿人禍未若明季亟朝端倒太阿四海皆
屏息內畏主恩移客氏陰協力外畏士民衆百
司皆卵翼橫行七載中天地黯無色豈待裁驛
時始慮黃巾逼開國有成訓內豎字毋識

望衡嶽不得到

坤輿形勢三楚長千峰萬嶂分南荒七十二峰
秀獨出屹然坐鎮摩穹蒼人生登山不登嶽何
殊河伯一見秋水誇汪洋曷來陟高望南嶽楚
天凝碧煙蒼茫南方火德符大夏豁然開朗浮
清光磅礴鬱積誰能究上有朱鳥炯垂芒就中
祝融峰最尊有時雲氣如飛霜綺霞絢爛明一
角魏夫人降驂鸞翔又疑湘靈鼓瑟罷芳蘭雜
佩斟瓊漿洞庭光涵萬頃玉風雲來往時飛揚

三湘七澤波勢湧靈氣盡向此中藏引領坐覺
 心胸拓便擬磨礱攀石磴觀羣芳寸步難到豈非
 命欲擲孟玳徒徬徨憶昔吳逆僭名號么魔意
 敢肆猖狂天兵一朝雷電掃山川奠定天篤慶
 百年以來佳氣擁望祝俎豆列冠裳豫章之材
 輸內苑橘柚之包陳上方卽今遊人遙望皆歎
 異百神呵護威靈彰吳山越山秀而媚未若此
 山峩峩千載雄南邦何當登巔攬其秀一一採

取入詩囊

登岳陽樓

水闊浮坤軸樓高逼太清
長吟醉仙句一豁夢
遊情古木城邊出飛帆
檻外行重湖青未了便
欲認蓬瀛

遊靈巖

忽驚身在萬峰頭
點點芙蓉繞畫樓
懸瀑聲中
晴亦雨古藤陰裏
夏如秋
琴臺客散絲桐冷
香

徑人歸麋鹿遊回首寒山夕陽紫漁莊汀草立
沙鷗

月夜舟行

遙看蟾影漾空虛一片青山畫不如柳陌菱塘
人寂寂數聲欸乃卸帆初

第三冊

卷十

蘇夫人世璋字文圭福建漳浦縣人泉州提督
某女世襲一等海澄公黃立齋室著有瑞圃詩
鈔二卷

瑞圃詩鈔

漳浦蘇世璋文圭

富春渚

朝發富春渚
清晨展遊眺
定山雜雲霧
逝湍見奔峭
迢迢萬里帆
中流歌水調
碕岸參錯分
日落山照耀
忽聞殷殷雷
臨圻相號噉
周遭三十里
翻浪恣叫嘯
但抱中孚心
風濤詎能剽
宵濟漁浦潭
飛泉媚孤嶠
芳林擧落英
野曠景逾妙

中懷得昭朗外物共談笑臨流發長吟湖光盡
詩料

擬陸士衡園葵

霖潦過庭除園葵自榮滋黃衣垂鮮澤元景揚
清輝丹心永不滓託質亦蕤蕤凜凜天氣清落
落卉木稀何如長向日淡淡依湘幃稱彼後彫
質詎樂爭芳菲

輓妾李氏

幻影真成夢飄零逐曉風感時傷永別留恨思
無窮秋盡芙蓉冷春歸杜宇紅可憐貞淑質寂
寞夜臺中

秋柳用王漁洋先生韻四首

秋風落木暗銷魂颯颯霏霏下玉門憔悴不堪
紫水畔婆娑猶自繞煙痕獨憐繫馬思長道何
處啼鳥入夜村一曲淒涼羌笛裏無情有緒總

難論

蕭蕭疎影度寒霜半入斜陽半野塘
草裏茱萸堪作佩竹間雲母可爲箱
眉銷灞岸思張敞腰瘦章臺恨楚王
莫遣使君重問訊故園西角永豐坊

芳春作絮點宮衣秋色蕭條漢苑稀
陌上隄邊花事盡星移物換故人非
難憑眠起隨風異惟解飄零逐雁飛
曾說金城千萬縷何堪流涕寸心違

深秋裊裊最堪憐一望平蕪雜暮煙
枚叔不逢空旖旎小蠻欲別尙纏綿
將軍舊壘傷今日帝子長隄憶昔年
爲想五株陶令宅西風搖曳夕陽邊

勗子

禮樂詩書春復秋韶年駒隙信難留
清泉未養童蒙德寒雪將侵慈母頭
踵武有懷兄弟在傳經無媿行名優
叮嚀記取高堂語更要尊師禮

義周

殘菊

素質真堪久，枝殘尚發花。
最憐清影好，和月碧窗斜。

塞上曲

莫怨君恩薄，都緣妾貌差。
胡塵猶萬里，離恨訴琵琶。

砧聲

寒衣擣盡月中聲
終古銷魂少婦情
最是離人聞不得
西風莫送到邊城